

# Mercosur-Ofkommes: EU-Agrar-Sektor schounen

D'EU an d'Mercosur-Länner (Brasilien, Paraguay, Uruguay an Argentinien) si sech politesch eens fir déi gréisste Fräihandelszon vun der Welt ze schafen.

D'ADR deelt d'Suerger vun de Lëtzebuerger Bauere-Verbänn a weist an Deeler dëst Fräihandelsafkommes däitlech zeréck. D'ADR hätt op alle Fall gär eng transparent Verhandlungsféierung mat Méiglechkeeten fir op nationalem Plang Afloss ze huelen. Esou en Accord muss och integral vun alle nationale Parlamenter vun der EU ratifizéiert ginn an net just vum Europaparlament.

D'Suerge gëlle besonnesch der Landwirtschaft:

- De Mercosur-Raum huet vill manner Oplage bei Ëmwelt, Klima an am Sozialberäich a kann doduerch méi bëlleg produzéieren.
- Mercosur-Staate si méi liberal bei der Gentechnik a beim Planzeschutz an och beim Asaz vun Antibiotika, déi bei eis scho laang net méi erlaabt sinn oder et nach ni waren. D'Gesondheet vum Konsument an d'Kompetitivitéit vun eisem Agrarsektor muss berécksiichtegt ginn, well d'Produkte aus de Mercosur-Staaten ginn ënner däitlech méi niddregen ökologeschen, gesondheetlechen a soziale Standarden produzéiert. Mir kënnen net an der EU de Glyphosat verbidden an all Dieren opmaachen, fir Wueren aus Länner, wou massiv gesprézt gëtt.
- D'Bëllegimporter wäerten den europäesche Maart zolidd duerchernee bréngen. Eis Baueren wäerten, an elo scho schwieregen Zäiten, duerch dës Bëllegkonkurrenz manner Suen fir hir landwirtschaftlech Produkte kréien, wat d'Betriber zousätzlech ënner Drock setzt.
- D'Gauch-Romantik ass am Mercosur scho laang passé. Hei gëtt eng intensiv industriell Agrar-Produktioun bedriwwen: Eleng Brasilien huet dëst Joer schon 33 Pestiziden zougelooss hun, déi an der EU net erlaabt sinn. Am Amazonas-Gebitt sinn iwwerdeems nei Rekord-Ofholungen verzechent ginn. An d'Ranner an Argentinien laafe scho laang net méi op der Weed mee ginn en Masse mat Methoden gezillt, déi an Europa an zu Lëtzebuerg scho laang verbuede sinn.

D'ADR ënnerstëtzt d'Fuerderung vun de Baueren datt d'Lëtzebuerger Regierung, a besonnesch den Ausseminister Jean Asselborn sech asetzt fir déi europäesch Standarden fir Landwirtschaft a Liewensmëttel ze schützen an d'Ofkommes kloer zeréckzeweisen.

D'Landwirtschaft dierf net um Altor vun de Wirtschaftsintressen geaffert ginn. Et kann net sinn, datt d'Lëtzebuerger Betriber, déi sech u streng national an europäesch Normen hale mussen, internationaler Konkurrenz ausgesat sinn, déi dës ekologesch a sozial Contrainten net huet. Och hei muss e „Level Playingfield“ a Chancegläichheet gëllen.